

Nafar gehienek ezkerren aldeko botoa eman zutela gogorarazi dio LABek PSNri

Erredakzioa / Iruñea

PSN-K ezkerreko gobernu bat osatzeko aukera guztiak baliogabetu dituela adierazi zuen atzo Nafarroako LABek, hedabideetara igorritako prentsa ohar baten bitartez. LABen ustez, «UPNk eta PSNk sinatutako akordioak ez du betetzen nafarren desioa; eta Europa osoko eskuin erreakzionario eta antidemokratikoena baztertu ahal izateko ezkerreko alternatiba bat osatzeko aukera guztiak baliogabetzen ditu, nafar gehienek ezkerren aldeko botoa eman duten arren».

PSNk UPNrekin akordioa egin badu boterean egoteagatik egin duela dio LABek. «15 egunetan hauteskunde programa oso bat pikutara botatzeko bezain erakargarria al da boterearen ondoko eserleku bat?», galdegin zion sindikatu abertzaleak PSNri.

EH-Nafarroako legebiltzarkideek gaur hartuko dituzte kreditazioak

Agentziak / Iruñea

TXETXU BARRIOS euskal presoak eta EH-Nafarroako beste zazpi legebiltzarkideek gaur eguerdian hartuko dituzten euren kreditazioak Nafarroako Legebiltzarrean. 12:00ak baino lehenago joango dira EHko ordezkariak Legebiltzarrera, baina eguerdian aurkeztuko dituzte kreditazioa hartzeko beharrezko legebiltzarkide agiriak. Txetxu Barrios presoak, beraz, Nafarroara ekarri beharko dute, berak bakarrik harbaitezake bere kreditazioa. Guardia Zibilak ekarriko du Madrildik, eta Legebiltzarrean dagoenean Nafarroako Polizia Foralaren esku egongo da.

Legebiltzarkide hautatuak izan direnek derrigorrez hartu behar dute euren kreditazioa, bestela etzi ezingo baitira Nafarroako Legebiltzarra osatzeko ekitaldian egon.

Oposizioko talde guztiek gogor salatu dute UPNren eta PSNren arteko akordioa

EHk eta EAJk bilera egin dute, hitzarmenak nolako egoera ekarriko duen aztertzeko

Efe / Iruñea

Oposizioko taldeek gogor salatu dute Miguel Sanz eta Yolanda Barcina hautetsi erreionalistak Nafarroako lehendakari eta Iruñeko alkate izendatzeko UPNk eta PSNk sinatu akordioa. Haien aburuz, PSNk iruzur egin die bere hautesle aurrerakoiei erreionalistekin akordioa lotzean.

ZORTZI parlamentariorekin oposizioko burua izanen den EH-Nafarroaren aburuz, sozialisten eta erreionalisten arteko akordioa «oso berri txarra da Nafarroarentzat». EHk salatu duenez, «PSN UPNren adar bat besterik ez da». «Hautabide aurrerakoien buru izanen zela iragarri zuen arren, azkenean nafarrak eskuinik atzerakoiaren esku utzi ditu berriro».

Iuren arabera, «akordioa oso txarra da ezkertiarren interesetarako». IUko kideen aburuz, «aurrerapauso kualitatiboa da, eskuinari lehen-dabizikoz Gobernua Parlamentuko gehiengoaren eskutik jasotzeko aukera ematen diolako». Salatu dutenez, «PSN akordioa eginez eskuindarren eremuan sartu da, zuzen-zuzenean».

CDNko idazkari Victor Maestuk esan du akordioarena «orrialde triste» dela Nafarroako historian.



JOXE LACALLE

EH-Nafarroako eta EAJko ordezkariak, atzo Iruñean egindako bileran.

«PSOEk nahi zuena egiten zuen garaietara itzultzea da», salatu du. Halaber, adierazi du akordioak arrazoiak ematen diela «Nafarroaren egonkortasuna zenbait mesederen truke eros daitekeela diotenei».

Earen ustez, ituna «etsigarria» da; izan ere, «une honetan Nafarroako gizartea aldaketa politikoa eskatzen ari zen». Horren erruduna PSN dela dio. «Behin eta berriz esan zuen gobernu hautabide aurrerakoia gauzatuko zuela,

baina azkenean uko egin dio horri». EAJren idurikoz, «akordioak argi utzi du PSN, ohiturari jarraiki, eskuinari laguntza emateko prest dagoela, erakundeetan zenbait postu lortzearen». Ildo bereetik, EAJk salatu du «PSNk berriro uko egin diola oposizio buru izateko ardurari».

EH eta EAJ, elkarlanerako prest

EH-Nafarroak eta EAJk bilera egin zuten Iruñeko Batzo-

kian, Foru Erkidegoaren egoera politikoa aztertzeko. Bileraren ondotik, EHko parlamentario Pernando Barrenak azaldu zuen bi indar abertzaleok Parlamentuan elkarlanean aritzeko prest daudela. «Topaketa interesgarria izan da gure arteko harremanak abian jartzeko», adierazi zuen. Ildo bereetik, Nafarroa Buru Batzarreko presidente Jose Antonio Urbiolak adierazi zuen bi indarrok «elkarlanerako prest» daudela.